

Bineix Aenhaw Hung Youz Daengx Gvangjsih Hai Haw Gvaq

7 nyied 17 hauh, bineix aenhaw hung youz daengx Gvangjsih heuhguh “vunz Gvangjsih youz Gvangjsih” youq Nanzningz Gozci Veicanj Cunghsinh hai haw, gungh hai 3 ngoenz. Gungh miz gyawj 300 aen vwnzva lijyouz giyez dai daengx gih gak dieg dauj ok 266 yiengh banhlap baenzroix doinyoengx vwnzva lijyouz, gyonjcomz miz gij sienqroen lijyouz、biuqdou gingjih vanzlij bouqlaeuj bouqngaiz daengj ceiq caezcienz、ceiq bienzgeiz, baengh “hawj hekyouz ikleih” “roengz gyaqcienz” doinyoengx “gai bae” lailai.

(Yiz Sienghczenz/喻湘泉)

► Dahsau Yauzcuz gyaundeiz dangqmaz de ndenq huqdoj baenzgwn hawj hekyouz cimz.



▲ Bouswnjcienz son' gyauq bouxhag dwk Aenbizbaz ciengq gobizbaz.

Sanhgyangh:

“Banhaemh Hwnjdangz” Hag Feihyiz

7 nyied 14 hauh, Sanhgyangh Duncuz Swciyen Vwnzva' gvanj hai aenban mbouj soucienz gingciengz sonlien bi 2020, 50 bouxhag sim' angq doxcomz dauj ndaw vwnzva' gvanj, gyonj hag baenzlawz ndaek aenbizbaz Duncuz ciengq gobizbaz Duncuz. Bineix, Sanhgyangh cauhoq banhlap swncienz feihyiz, ciuq gij guhfap “gag nyienh camgya + banhaemh mbouj soucienz hwnjdangz + bouxhag diemj hag” daengj guh sonlien baenz gvenq bae; gyoengq bouxhag mbouj yungh bauqmingz, seizlawz daengz couh seizlawz hag dinfwngz feihyiz, lumj golaux Duncuz、gobizbaz Duncuz、boq venz、boq dig Duncuz daengj, haenqrengz youq dieg Duncuz ciengxganq “bouxak” vwnzyi, doek “ceh” vwnzva lailai, baengh vwnzva banggunz, okrengz coengh dieg Duncuz lai ndei dwkhingz ciengzciengq satlaeng gunggeng duetgungz.

(Gungh Bujgangh/龚普康)

Ningzmingz Langhbaij Mbawsiengq Angqhoh Byaraiz Lied Haeuj Seiogyaiq Feihyiz Ndaej 4 Hopbi

2016 nienz 7 nyied 15 hauh, Vehdat Byaraiz Ningzmingz youq Daih 40 Gaiq Seiogyaiq Yizcanj Daihhoih ndaiej lied haeuj ndaw feihyiz seiogyaiq gaep bae, de baenz guk raeuz daih 49 giz feihyiz seiogyaiq gaep. 7 nyied 16 hauh, Ningzmingz Yenveij Senhconz Bu、Vwnzva Lijyouz Giz、Ingjsiengq Hezveiguh baez hozdung ndeu, langhbaij mbawsiengq angqhoh Byaraiz Ningzmingz liedhaej ndaw feihyiz seiogyaiq gaep ndaiej 4 hopbi. Baez langhbaij neix baijok 80 fuk(cuj) mbawsiengq ndei hawj vunzlai ndawbiengz yawj; gij mbawsiengq neix daij 500 lai fuk(cuj) mbawsiengq ndawde genjleh okdauj; gijneix cungj youz doenghboux maij ingjsiengq ndaw yienh rog yienh de ingj baenz le bauq dauj camgya bingzbeij.



▲ Vunzlai daengz yienhciegz yawj mbawsiengq langhbaij.

(Couh Yizgangh/周贻刚)

Hozciz Si Aen Dieggoek Fugsah Deihfueng Laebfap Youq Hozciz Yozyen Venjbaiz



▲ Bouxdaeuz song baij guhdoihi biengj baiz.

7 nyied 17 hauh, aen yizsiz biengj baiz ciemdingh hezyi heuhguh “Hozciz Yozyen • Hozciz Si aen dieggoek fugsah deihfueng laebfap” de youq Hozciz Yozyen banh. Youq mwh guh yizsiz, Hozciz Si Yinzda Cangzveijvei fucujyin Vuz Gyahegz caeuq Hozciz Yozyen Dangveij cangzveij、fuyaucangj Veiz Vwnz-gvangj ciemdingh hezyi laebbaenz Aen Dieggoek Fugsah Deihfueng Laebfap, caemhcai guhdoihi biengj baiz, laebbaenz aen dieggoek neix lo.

(Cinz Fanghsw/覃芳思)